

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

SULU FEPUARI 2012

Faatonu: Cellphone: 7715037 -Main Office: Ph. 24414, Ext 30 - website: [www.cccs.org.ws](http://www.cccs.org.ws)

## Foa'i e le EFKS i Samoa le 2 eka i Aleisa mo le Ekalesia i Tokelau



O le Aso Lulu, 8 Fepuari 2012, na tau'a'ao aloa'ia atu ai e le Afioga i le Taitaifono o le Ekalesia, le Susuga i le Faifeau Toeaina o Lale Ieremia, pepa i le

Taitaifono o le Ekalesia i Tokelau, e tuu aloa'iaina atu ai le fanua e lua eka i Aleisa Sisifo, e avea ma mea totino a lea Ekalesia. O le Susuga i le

Toeaina o ia foi o le Taitaifono o le Ekalesia i Tokelau, Susuga ia Mose Keresoma, (silasila i le ata i luga), na ia taliaina pepa o le  
*faacacau itulau e sosoo ai*

# O LE LAUGA

O le Lauga i le Suafa Mamalu o le Atua le Tamā, le Atua le Alo, ma le Atua le Agaga Paia. Amene.

**Tusi Faitau:** 1 Samuelu 3: 4 – 9

**Matua:** 1 Samuelu 3: 9

*“Afai e valaau atu o Ia iā te oe, e te fai atu ai, Fetalai mai ia le Alii e, o lo’o faalogologo atu lau auauna.”*

**Manatu autu:** A’OA’OINA IA FA’ALOGO, MA FA’ALOGO IA A’OA’OINA

O le ola a’oa’oina i le gasologa o le olaga e amata lava i le faalogo. E faalogo le fanau i le a’oa’o atu a matua i mea lelei e manuia ai. E faalogo le tama ma le teine a’oga i le faia’oga e potu ai. E faapea foi le taulealea tautua ona faalogo i le matai mo sona a’oa’oina. Ae afai e leaga le faalogo pe sese foi mea e faalogo ai, ona leai lea o se a’oa’oina lelei o le mafaufau.

O le mea moni, e le tau a’oa’oina fua le faalogo aua o tagata uma ua i ai taliga e faalogo ai, vagana e logonoa. A’o le manatu o le failauga, e mana’omia le a’oa’oina lelei o le faalogo. E mana’omia le a’oa’oina

lelei o le faalogo ia iloa ituiga leo eseese, aemaise ai o le iloa o lē o lo’o valaau mai. A lelei ona a’oa’oina le faalogo, e a’oa’oina foi i mea e faalogo iai. Ma e mafai ona tino mai lea a’oa’oina lelei e ala i le ola usiusitai i le ua valaau mai. E usitai le vaai – e usitai le tautala – e usitai le mafaufau – e usitai le tago atu i mea lelei – E ola faalologo ma ola usiusitai.

[tala]: *Sa tuli e le toeaina lona atalii e alu e fai i le lo’omatua, e fai lana meatausami ona e fai si tuai atu. Fai atu loa le toeaina i lona atalii – Alu e fai ia Mama, tausami e ia le moa, ae ai ma a’u le fasi-povi. Ua tei le loomatua i le auselasela atu o si ana tama ma le poloai – Mama, fai mai Papa e tausami loa oe. Ae fai mai e tausami ma oe le moa, ae ai ma a’u le fasi-povi. Ua fiu si toeaina e faatali mai lona atalii ua gula i le fasi-povi. A’oa’oina ia Faalogo, ma Faalogo ia A’oa’oina.*

O le tu’uina atu e Elekana ma Hana o le tama o Samuelu i le Fale o le Alii, o le ofoina atu lava lea o lona ola e auauna ai mo le Atua i aso uma o lona ola, e pei ona tauto ai Hana i le Atua. A o se auaunaga sa amata mai i le lē iloa o se mea, ma le faamoemoe o le nofo ai i le Fale o le Alii, ia fai ma falea’oga o le ola a’oa’oina i mea lelei uma. E

tusa ma le molimau a le tusitala, sa auauna Samuelu i le Alii i luma o Eli.

O Eli, o le faitaulaga filifilia a le Atua mo Isaraelu uma e tusa ma lana tofiga i le aiga o Arona. Ua lamalama fa’ai’u lana auaunaga i le Atua ona ua faasolo ina matua, ua matua atu ai ma le ola agasala o Isaraelu. O le amioleaga a lana fanau i le faaaogaina ma le tufatufaina o taulaga a tagata, ma peiseai a fao faamalosi ma fia pule i taulaga a tagata, sa inoino ai le nuu ma solomuli ai le ola faitaulaga i le Atua. Ae lei lilo ia mea leaga a le au-uso i le Atua. O le lē fautuaina la o Eli e tusa ma amioga le taupulea a lana fanau, na tupu ai le toasa o le Atua ma motusia ai lona aiga uma mai ona nafa faaositulaga.

O le vaitau o le aveai ai o Faamasino ma ta’ita’itama i le ola faaleagaga o Isaraelu. Ma ua i ai Isaraelu i se tulaga o le tamaoiaiga i mea leaga; ua solomuli le olaga tapuai ma ua aunoa se ola mata’u i le Atua. Ma ua manaomia se faafouga o le olaga tapuai o Isaraelu.

O le valaauina la o Samuelu e le Atua, ia fai ma ona fofoga e momoli lona finagalo i tagata. Lea lava na amata i le feau a le Atua mo Eli ma

*faacauu itulau e sosoo ai*

## Foa’i e le EFKS i Samoa le 2 eka i Aleisa mo le Ekalesia i Tokelau

foa’i. Sa auai foi i lea taeao le Susuga i le Failautusi Aoao o le Ekalesia, Susuga Rev. Dr. Iutisone Salevao, le Teutupe le Susuga Rev. Kuatemanu Ulutui, ma le Komesina o Fanua ma Fale o le Ekalesia, Susuga Rev. Epati Setefano.

O le foa’i ua leva ona pasia e le Fono Tele, a o lea ua faato’a faataunuuna aloa’ia, ina ua

mae’a ona fua le fanua, faapea isi itu faale-tulafono. Sa auai foi ma le Failautusi o le Ekalesia i Tokelau, le Susuga ia Faamanuia Tamoa.

O le faamoemoe o le Ekalesia i Tokelau, e fausia ni fale i lea fanua, e fai ma nofoaga e faamautu iai o latou tagata pe a malaga mai i Samoa.

O le tausaga ua mavae na

faamanatu ai le atoaga o le 150 o tausaga o le lotu i Tokelau. Na faimalaga atu ai mo lea sauniga: Susuga i le Taitaifono Rev. Lale Ieremia FT, Susuga Peleti To’ailoa FT ma le faletua, Susuga Kerisiano Soti ma le faletua, le Failautusi Aoao o le Ekalesia, Susuga Rev. Dr. Iutisone Salevao, ma le alii tiakono le Tofa Namulauulu Tavita. Na latou tuuina atu foi i le Ekalesia i Tokelau se meaalofa mai le Ekalesia i Samoa, e NZ\$40,000.

# O LE LAUGA

lana fanau ma lona aiga uma. Aemaise ai o le toe atiae o le ola faaleagaga o Isaraelu, le ola tapuai ma le faitaulaga i le Atua. Ma sa matua iloga suiga fou i le olaga o Isaraelu i lea vaiata (i le va o Faamasino seia o'o ina filifilia le ulua'i tupu o Isaraelu) ina ua fai Samuelu ma perofeta a le Atua. Auā sa matua faamaoni Samuelu i luma o le Atua i le faatinoga o lona valaauina.

A o le faamaoni na lalagaina mai ina ua a'oa'oina le faalogo; o le faalogo i le Atua na a'oa'oina ai ma atamai ai e faia le finagalo o le Atua; na atamai ai e ta'ita'i le nuu ma lalagaina se olaga fou ina ia manuia le nuu. Mai i le leiloa o se mea, sa iloa ai ona a'oa'oina ia faalogo ma faalogo ina ia a'oa'oina.

Na valaau le Atua ia Samuelu a o moe i le malumalu. A o le malumalu o le nofoaga e afio ai le Atua; o le Afioaga Paia o le Atua. Na muai faalogo Samuelu i le siufofoga fetalai mai o le Atua a o faatasi ma le Atua i lona afioaga Paia.

Ae lei iloa e Samuelu lena mea auā ua na'o ia o se tama itiiti. O le lē iloa e Samuelu o le fetalai mai o le Atua, e mafua ona e lei faalogo muamua ai. E mafua ona e le masani ai. Auā e manino i le molimau a le tusitala, e lei faaali muamua le Atua ia Samuelu, e lei o'o ina iloa e ia le Alii, e lei faaalua foi ia te ia le afioaga a le Alii.

O lona le malamalama i ia mea, na ia le iloa ai ona tali atu i le valaau. O le atutolu ona valaau o le Atua ia Samuelu, na ilca ai e Eli, e ao ona a'oa'oina le tama ia iloa ona tali atu pe a faalogo i le siufofoga fetalai o le Atua.

*"Afai e valaau atu o Ia iā te oe, e te fai atu ai, Fetalai mai ia le Alii*

*e, o lo'o faalogologo atu lau auauna."*

O le fa o valaau na atamai ai Samuelu ona tali atu – *Fetalai mai ia le Alii e, o lo'o faalogologo atu lau auauna.*

O le tali a Samuelu, o le tali a le tagata ua a'oa'oina ia faalogo i le ua valaau mai. O le tali a le auauna ua fia faalogologo i le fetalai mai a lona matai ina ia a'oa'oina ai lona auauna valaauina.

E fia faatauaina i le tapenaga o leni masina le Aso o Tupulaga. Ou te faapea atu ai i tupulaga uma o le Ekalesia - Se mea ina a manaia pe ana faapea uma tama ma teine o se Ekalesia le fiafia e a'oa'oina ia faalogo ma fia faalogologo i le fetalai mai o le Atua e a'oa'oina ai.

Ua saosaoa i nei aso amioga le taupulea i tupulaga ma fanau. O suiga fou o tu ma aga mai fafo ua taavilia ai ma olaga o fanau. E savali a le tama ma le teine i le auala ma 'ai ma inu. Ua fai ma masani a isi le usu i le tafao ma tietie pasi i le aso atoa. O tifiga esecese e amata mai i le tumuai e o'o i vae. Ua a'oa'i e isi fanau o latou matua a ua le fia faalogo i le a'oa'o atu a matua. Toeitiiti tofu le tama ma le teine ma le telefoni feaveai, ma ua o'o a i totonu o le falesa i taimi o sauniga ua faaoga ai. Ma le tele o suiga fou ua vaaia i le olaga o fanau. Ae faafetai i le Atua, e le o tupulaga uma o Samoa o lo'o faia nei uiga mataga.

E le tuuaia suiga fou o le olaga auā o suiga e mafai lava ona alofia. Ae mafua nei amioga ona o le lē fia a'oa'oina o tupulaga talavou ma fanau, ia faalogo i le siufofoga fetalai mai o le Atua. Ua le fia faalogo foi ina ia a'oa'oina ai o latou olaga. Ua ola ma le lē fia faalologo i le Atua.

Tupulaga c. e i ai itu lelei o suiga fou. Ae i ai foi ona itu le lelei pe

afai e sese ona faatino; pe afai e le o gatasi ma tu ma aga faaaloalo na a'oa'oina ai i tatou. E le aoga nei suiga fou pe afai e ta'ita'iseceseina le tagata mai ala o le Atua.

O oe o le lumanai manuia o aiga, nuu ma le atunuu aemaise o le Ekalesia a Keriso. A o le lumanai manuia e lalaga atu nei i lou tama ma lou teine talavou ina ua e talia le siufofoga o le Atua, e te faalogo foi ma usitai ai e fai oe ma auauna mo la ma lona finagalo.

E ala esecese mai le siufofoga o le Atua mo i tatou. Faalogo i le musumusuga a lona Agaga i lou loto; faalogo i lona fetalai mai a o lua mafuta i le tatalo; faalogo i lona siufofoga a o e faitau i ana Afioaga Paia; faalogo i upu lelei a matua ma faifeau ma toaga e alu i le Fale o le Alii.

Le Ekalesia e, o faapefea mai lau faalogo? Ua tele le mau leo esecese ua tumu ai le ta faalogo, ma ua tauau ina le lagona atu ai le siufofoga tauvalaau o le Atua mo lana Ekalesia. O se Ekalesia manuia ma maopopo se Ekalesia e atamamai e faalologo i le Atua. E manuia foi le malaga a lau Ekalesia o leni tausaga ua savalia pe afai e tali atu ma le agaga fiafia ina ua faalogo i lona valaau mai.

O Iesu Keriso o le Alo o le Atua na afio mai i le lalolagi ina ia laveaina le lalolagi ia te Ia e ala i lona Maliu ma lona Soifua Manumalo mai le oti ma le tuugamau. Lo tatou manumalo lena faatasi ma ia pe afai tatou te talia ma le loto salamo lona valaau mai.

*Afai e valaau mai o Ia iā te oe, e te fai atu ai, Fetalai ma ia le Alii e, o lo'o faalogologo atu lau auauna.*

Amenc.

**Caesar Samuelu (ATN)  
EFKS Pata Falelatai**

# O LE LAUGA O LE ASO SA O TUPULAGA

## LAUGA-ASO SA TUPULAGA 2012

F. Tuai: Ruta 1: 1 - 5      F. Fou:  
Mareko 1: 40 - 45

Matua: Mareko 1: 41, "*Ona mutimutivale lea o le alofa o Iesu ia te ia, ua aapa atu lona aao, ua pa'i atu ia te ia, ma fetalai atu ia te ia, "Ou te loto i ai, ina mamā ia oe."*

Manatu Aoao Vaiaso: Iesu -  
Faiaoga ma le Foma'i.

Manatu Autu Aso Sa: (Aso Sa  
o Tupulaga)

Pa'i atu ia te i latou e lē matāgofia.

(Touching the untouchables)

O le alii tusiata Italia o Michaelangelo, na ia tusia le ata lauiloa ua faaigoa, 'O le faiga o Atamu'. O le ata o le Atua i lona foliga faa-Tamā, o aapa atu lona aao, e pa'i atu i le lima o Atamu. O se itu mata'ina o lenēi ata, le Atua o afio i totonu o le faatusa o le fatu - o le fatu ua vaeluaina.

E talitonu lenēi matuaofaiva, o le pa'i mai o le Atua, le pogai o le ola o le tagata. E talitonu foi o ia, o le aapa mai o le aao o le Atua, e afua mai i totonu o lona alofa.

O le Tusi ia Ruta, o loo mamanuina i auala eseese na pa'i mai ai le aao o le Atua, e faaola le tagata, e lavea'i le aiga ma le nuu, na lofia i lologa, o puapuaga e tutupu i le olaga nei.

O le tala e autū i le tama'ita'i Moapi o Ruta, na tala lona gafa i le aiga Peteleema, o Elimeleka ma Naomi ma le fanau o Maalona ma Kilion.

O le tala na amata mai i le oge, o le mativa matelaina na tuua ai aiga, o nuu ma tapua'iga, ae aisola i nuu ese. Na sosoo le aasa o le oge, ma

le oona o le maliu o le tamā, o le ta'ita'i ma le faamoemoega o le aiga. Ae mulimuli mai ai le matuitui tiga o le maliliu o le fanau tama e to'alua, o le lima taumatau ma le malosi o le aiga. Na tanumia atu ai ma le lumana'i o lea aiga, auā e maliliu, e leai se suli e fa'aauuina le gafa. Fai mai le tala, 'ona toe lea o le fafine, ua oti ana tama e toalua atoa ma lana tane.'

E leai se tagata mafaufau lelei, e fia pa'i atu i lea ituaiga tagata, ua i ai le tina matua ia Naomi. Auā e fai o ia ma faaopoopoga o le avega mamafa i lona tausiga; e fai ma faafitauli, toe faalavelave a o tele isi tiute ma mana'oga fia faataunuu vave. E manatu nisi, o se mala ua faapea ai, ma e malaia le tagata e pipii pe fesoota'i i ai. Ua i ai nei Naomi i se tulaga lē ma tāgofia; ua tuulafoa'iina ia oti. Ua tatau ai ona ave ese mai totonu o le sosaiete.

O Ruta na fa'aogā e le Atua, e fai mona aao e pa'i mai ai le vaa faaola ia Naomi. Na amata mai le tausiga a Ruta i le aso na faaipoipo ai, se'ia oo ina maliu lana tane o Maalona. E sefulu isi tausaga faaopoopo, o mafuta pea nei fafine ua oti a latou tane, ma tausi ia Naomi. Sa faigofie ia Ruta ona faatino lana auaunaga alofa, auā o lona lava nuu o loo nofo ai. Ae o le aso na tula'i ai Naomi o le a alu ese, e toe fo'i i lona aiga ma le nuu moni, o iina na tofotofoina ai le alofa moni o Ruta, ma iila mai ai lena alofa, e pei o le auro e susunu i le afi.

O lana ta'utinoga lauiloa na fai ia Naomi, ina ua latou taumavae, fai mai, "O le mea e te alu i ai, ou te alu ai foi; o le mea e te nofo ai, ou te nofo ai, e fai lou nuu mo'u nuu; e fai lou Atua mo'u Atua; o le mea e te oti ai, ou te oti ai, e tanu ai foi a'u."

Ua aapa atu Ruta ia lē ma tāgofia faatasi ma Naomi; ua sauni e savalia le ala gaoā, e sopoia le Sami Oona, ma o ifo i le nuu na te lē iloa.

E lē faigofie le ulufale o se tagata ese i totonu o Isaraelu, ae maise se tagatanuu o Moapi, o le fili o Isaraelu. E manino lelei Ruta i le vaai maulalo ma le faatauvaa o Isaraelu i si ona nuu.

Peita'i, e lē vaai mata o le alofa, i ni lavelave poo ni tuatuaiga, o a mea o faatali ma mulimuli mai. Na te faamuamua le mafatiaga i le taimi nei. E faasili le taunuu manuia ma filemu o le tagata ua tiga, ma ia tausia lelei i aso o totoe o lona ola. E pei lava le alu a Ruta i Peteleema, o le alu a Aperamo ina ua valaau i ai le Atua. E alu ma le lē iloa le mea o aga'i i ai, ae mautinoa o loo i ai le Atua. E alu ona o le alofa.

E lē iloa poo ai matua o lenēi teine, ae amuia le manava ma le aiga na fanau mai ai o ia. Na tupu a'e foi o ia i lona olaga faataule'ale'a, i totonu o le aiga o Naomi. Na vaai ma faalogo i ai Ruta, i le ola tapua'i o le aiga mai Peteleema, ua fafaga ai lona ola faaleagaga. O le alofa, e fanau ma a'oa'oina mai i totonu o le aiga. E iloa gofie tupulaga e fua mai i alofa, e o mai i aiga o loo totō ai.

Na taunuu le malaga i Peteleema, o i ai le taule'ale'a o Poasa, le tagata mau tofi, o le tagata a'oa'oina lelei, o le tagata foi sa i ai le oloa ma le tamaoaiga. Ae o le silisili o na mea, o ia le tagata sa i ai le alofa e tutusa le matagofie o ona foliga, ma le lalelei o le alofa faa-Ruta; o le alofa lea i le tagata puapuagatia.

Na iloa e Poasa ua i ai le tagata ese, i totonu o lona fanua ma lana faatoaga. Ona ia tatala lea o avanoa

*faacuaui itulau e 11*

# O loane Uikilifi - le Fetuao o le Toe Fuata'iga (Reformation)

C. 1330 - 1384

## O le Faitoto'a e le mafai ona tapunia e se tasi

Ua foliga ua vavaeesea Uikilifi mai mea uma sa masani ai. O le vai taimi lenei na ia liliu atu ai i se fesoasoani mai le Atua. Na iai lava lona manatu e iai sona aoga i le lalolagi nei, peitai na iai foi lona lagona e fia faalogo pea pe o se a se musumusuga mai le Atua mo ia. E talitonu, o ana talosaga i lea vai taimi, na malamalama ai o ia i le mafuaaga o lona ola i le lalolagi nei.

Ua faaosofia nei o ia, ma na ia iloa, o Latauefi, (Lutterworth) le mea oloo iai nei o le a le avea o se 'falepuipui' a o se nofoaga o le a faataunuuna ai le finagalo paia o le Atua, o se nofoaga o le a fesoota'i ai le taimi a le Atua, ma le miti oloo i lona agaga.

O lenei la ua ia malamalama. I le filemu ma le le lauiloa o lenei nofoaga o Latauefi, o le a amataina ai e ia le galuega ua aupito sili ona lauiloa ai o ia i nei ona po: o le faaliliuina lea o le Tusi Paia mai le gagana Latina i le gagana Igilisi taatele. Na iai nisi o ana uo na auai faatasi atu ma Uikilifi i Latauefi. E iai Ioane Pevei, ma Nikolao Herefoti.

O Pevei o se uo mamae a Uikilifi. O ia o le failautusi faapitoa a Uikilifi, ma o se tasi sa mafuta pea ma Uikilifi, seia oo i le i'uga o le soifua o Uikilifi.

Ua limasefulu ma le tasi nei tausaga o Uikilifi, i le taimi na ia

amata ai ona ia faalau ia Pevei ana tusitusiga, aua ua talitonu lava Uikilifi o lana miti ma lona faauuina, o le a faasolo ma lafo atu mulimuli ia Pevei pe a i'u lona ola.

O Herefoti, o se tasi sa galulue faatasi ma Uikilifi, o se tasi o tagata aupito sili ona lelei lona aoaoina i Okisefoti. O le Dr. Divinity lona faailoga. Sa galulue ma le le faavaivai o ia faatasi ma Pevei i le faaliliuina o le Tusi Paia Latina i le gagana Peretania. A o uiga o Herefoti e le tutusa ma uiga o Uikilifi ma Pevei. E ma'ale'ale ma le le mataofiofia uiga o Herefoti. O Herefoti foi o se tasi lea o tagata aupito saua o i latou sa mulimuli ia Uikilifi.

O tausaga na sosoo ai, sa galulue ai i latou nei i le po ma le ao i le faaliliuina o le Tusi Paia. Ua matua lagona foi e Uikilifi lona faauuina e le Atua mo lea galuega, ma ua ia maua ai le malosi e vaaia ai lenei galuega tele. Ua lauiloa lava le talitonuga o Uikilifi na ia faaliliuina le Feagaiga Fou, a o Herefoti ma Pevei na la faaliliuina le Feagaiga Tuai i lalo o le vaaiga a Uikilifi.

### O Ta'iala e Lima mo le suesueina o le Tusi Paia.

Aisea na amataina ai e Uikilifi lenei galuega tele? O se galuega sa manatu lava le toatele o tagata

e le faigofie. I Europa atoa, e le'i iai lava se Tusi Paia i le gagana taatele a le atunuu. O le gagana Latina sa faamamaluina lava ona o le manatu e pa'ia, ma o se gagana mo na o latou ua a'oa'oina. Ma le isi, o le toatele o tagata i Egelani e mafai atu lava i le 'au le a'oa'oina, o lona uiga, e le 'ilafia faitau tusi. O le isi, e le'i lautele ona fausia o masini lomitusi, faato'a taatele i le isi senituri e sosoo ai. O le mea lea, o le a le taatele ai lava ni Tusi Paia i le gagana taatele a le atunuu. O le mea lea, o se galuega matua mamafatu lenei ua faia e Uikilifi. Vagana ai se tasi ua na faalogoina moni se musumusuga mai le Atua, o le a ia mafai ona faia. Ma na le taumateina ai lava, na musumusuina lava Uikilifi e le Atua e na te faia lea galuega tele.

O le talitonuga maumaututu o Uikilifi, ona pau lea o le pule tutasi mo le ola uma. Na tusi o ia faapea:

O le iai o Keriso i le Tusi Paia, ona pau lava lea o le mea e manaomia mo le faaolataga, e manaomia e tagata uma, ae le na o faifeau (priests). O le tulafono silisili lea e pulea le tapuaiga, le malo, ma le soifua faa-Kerisiano, e le faaopoopoina atu iai ma ni tu ma ni tulafono.

Sa talitonu Uikilifi o le a le mafai e tagata lautele ona latou iloa le mea moni se'i vagana ua latou iloa pe o se a o fai mai ai le Tusi Paia. Na talitonu foi Uikilifi o le a le mafai ona iloa e tagata lautele le Tusi Paia, se'i vagana ai ua i le latou lava gagana.

Fai mai o ia, sa a'oa'oina e Iesu ma ona soo ia tagata i le gagana sa sili ona malamalama ai latou. O le a atili malamalama i le faatuatua faa-Kerisiano pe a malamalama atili i le faatuatua.

*faacau itulau e sosoo ai*

# O Ioane Uikilifi - le Fetuao o le Toe Fuata'iga (Reformation)

## C. 1330 - 1384

O le mea lea, o mataupu silisili ia le gata ina faalauiloa i le gagana Latina, a ia faalauiloa foi i le gagana taatele o tautala ai le toatele o tagata. Ia maua e le au faatuatua mataupu mai le Tusi Paia i le gagana e sili ona malamalama ai latou.

Sa mamafa lava le mafaufau o Uikilifi i tagata lautele. Na manatu o ia, a latou maua le Tusi Paia i le latou lava gagana, ma mafai ona latou faitauina, o lona uiga e latou te manaomia se ta'iala mo lo latou faitau ma su'esu'e iai. Na faaiuina ai lea e Uikilifi lana galuega i le faataatia o ta'iala e lima mo le faaliliuina ma le su'esu'eina o le Tusi Paia:

1. Sa'ili se faaliliuga lelei.
2. Ia malamalama i uiga o mataupu silisili
3. Faatusatusa vaega o le Tusi Paia.
4. Sailiili ma le loto maualalo.
5. Talia musumusuga a le Agaga.

Ona faaauau ai lava lea ona faaliliuina le Tusi Paia atoa mai le gagana Latina (Latin Vulgate) i le gagana Igilisi faa-Mitilani (Midland English dialect. Ma e ui lava ina iai nisi faaliliuga o le Tusi Paia na mulimuli ane ai i lenei galuega fita ma le anoanoa'i na faia e Uikilifi, ae oloo tatou vaia lava le aafia o ia faaliliuga i faaupuga na faaogaina e Uikilifi ma i latou na latou galulue faatasi.

Se'i o tatou suesue i nisi o tali mai a le Lotu Katoliko e uiga i le faaliliuga na fai e Uikilifi.

O le pulega a le Pope na faatauasoina ai lava i latou i le Lotu Katoliko. O le faaliliuga o le Tusi Paia i le gagana o tautala ai tagata lautele, na fai mai le Lotu Katoliko o se faiga e feteena'i ma talitonuga a le Ekalesia. O le tausaga e 450 na faaliliuina ai e se faifeau iloga o le Ekalesia, o Ierome le Tusi Paia, o lea faaliliuga sa ta'ua o le Latina Vulgate, ma ona pau lea o le faaliliuga na faatulagaina e le Ekalesia Pope e faapea e "pa'ia" ma e latou te talia. A fultua i lea faaliliuga o lona uiga o le faifai ma upuvale i le Ekalesia.

Fai mai se tasi o tusitala iloga i ia vai taimi o Uikilifi:

'Na tuu mai e Keriso lana Tala Lelei i faifeau ma foma'i ta'uta'ua o le Tusi Paia, ina ia latou tuuina atu i tagata lautele ma e vaivai....A o lenei ua faaliliuina e lenei alii o Ioane Uikilifi mai le faa-Latina i le Igilisi, o se gagana a tagata Egelani ae le o le gagana a agelu. Ma o le faaliliuina e Uikilifi o le Tusi Paia, ua avea ai le Tusi Paia o se mea e aia foi iai tagata lautele, e oo lava foi i fafine ua latou mafai ona faitauina....O le mea lea, ua lafoa'i ai le penina o le Tala Lelei i luma o pua'a. Ua avea le penina a faifeau o le lotu, ma mea faitele e taaalo ai tagata lautele. Ma o le mea sa fai ma meaalofo mo faifeau ma i latou ua a'oa'oina lelei o le Ekalesia, o lea ua faitele nei e tagata lautele.'

Ou te le iloa ia outou, ae o a'u, ou te le fiafia i le ta'u o a'u o le

puaa. Peitai, ua faalia mai ai lava i lea tusitusiga le ituaiga mafaufau ma talitonuga sa iai i ia vai taimi. A le o oe o se tasi o tagata taua o le Ekalesia, o lou ola e le taulia ma amana'ia. O lo latou talitonuga, o fafine o meanoa lava. Ou te matua le malamalama lava pe aisea na ia tusia ai e faapea o le Tusi Paia o se meaalofo mo faifeau ma tagata popoto ma taua o le Ekalesia. Aua o le mea matua moni lava ma faamaoni, e sea sea o latou faitauina le Tusi Paia. E le o fai mai foi Tusitusiga Paia e faapea o le gagana Latina o le gagana lautele lea e tautala ai agelu.

Tele ni tausaga ua te'a, ona fai ai foi lea e Arunitele, (Arundel) le akiepipopo o Kaneperi (archbishop of Canterbury), ni ana tala e matua matuitui ma leaga ma faavevesi. Ou te talitonu ai o lea akiepipopo o ia lea o se tasi o tagata aupito tevolo ona uiga ma amio pi'opi'o i ia vai taimi. O ia lea na tusi e faapea:

O Ioane Uikilifi, o ia o se faama'i leaga ma le pipisi, o le atalii o le tevolo, o ia foi o le atalii o le anitikeriso, sa tumu lona mafaufau i mea leaga e leai ni upu e mafai ona faamatalaina ai. O le faatumutumuga o lona ola leaga na ia faaliliuina ai le Tusi Paia i le gagana a le atunuu (mother tongue).

Tasi lava le mea na maua mai i nei upu mamafa o le maumau o le savili le aoga ua aliali i le talafaasolopito o le lalolagi. Aua o le ute lava o lenei mea, ma o se matati'a ausia, ua avanoa le Tusi Paia mo tagata ina ia mafai ona latou iloa ai le Atua mo latou lava. O le mea na fai e Uikilifi na faatauaina ai le toto o Keriso na faamaligiina mo tatou. Ma e tatau ai ona tatou faafetai ia te ia ma le mea na ia faia. Na taumafai

*faaauau itulau e sosoo ai*

# "O LE FAA-FAAPOTOPOTOGA (Congregationalism)"

(faaauau mai le Sulu Samoa o Ianuari 2012)

Saunia e le Matagaluega o le Talafaasolopito o le Ekalesia: Arthur Wulf, Visiesio Sega & Latu Latai

## Ekalesia i le Feagaiga Fou

O le upu 'ekalesia' e pei ona faaaogaina ai i le Feagaiga Fou, e faaliliu mai le upu Eleni o le ekklesia(4).

(4) (O le upu ekklesia e faavae mai upu Eleni e lua, o lona uiga, 'o se faapotopotoga ua valaauina poo ua vavaeeseina.' I lona uiga i le Feagaiga Fou e faasino ia i latou ua o mai faatasi i se mafutaga fou ua

naunau ia Iesu ma le olaga ua faasino mai e le Upu a le Atua. O le mea lea e foliga ai i latou o e ua vavaeeseina mai le lalolagi.) 1 Korinito 5:12-13: "Aua o ia te au ea ona faamasino i e ua i tua? O outou e faamasino i e ua i totonu, a o e i tua, e faamasinoina i latou e le Atua. O lenei ia faateaeeseina e outou lena tagata amio leaga ia te outou."

O le upu ekklesia, o se upu sa faasino i se potopotoga i se faapotopotoga o tagata Eleni ua o mai faatasi e faaali manatu ma faia filifiliga e tusa ma mataupu e aafia ai i latou ma lo latou sosaiete.(5)

## O loane Uikilifi - le Fetuao o le Toe Fuata'iga (Reformation)

le Ekalesia Katoliko e tuu i se pusa faalilolilo le tau na faatauina ai tatou e Iesu. Ua taumafai i latou e faamaualuga lo latou tulaga i faiga faale-tagata.

Ua ou matauina foi oloo iai le igoa o Uikilifi faatasi ma isi e ta'ua o i latou ua a'aitui i le Ekalesia. Manatu foi isi ua faaleagaina e Uikilifi le to'afilemu o le faatuatua Katoliko. E moni, ae na ia faia i lalo o le taitaiga a le Atua. E le iai le Atua i polokiki a tagata. E le iai i ni faiga sese. E le afio le

Atua i ni tulafono. E afio i le fatu ma le agaga o le tagata. O le Atua e le o se ta'ita'i o se vaega. O ia o le Ao o le Ekalesia moni.

Fai mai le Ioane 3:16: "...ina ia le fano se tasi e faatuatua ia te ia, a ia maua e ia le ola faavavau..."

Fai mai foi le Roma 8:14: "Aua o i latou uma ua taitaiina e le Agaga o le Atua, o atalii i latou o le Atua." O le iloa e le tagata o le Atua i le agaga, e mafua mai i lona vavalalata ma le Atua.

Mai le tusi: God's Generals, tusia e Roberts Liardon, faamatalaina e Afemata T. Apelu Aiavao.

(5): O le upu 'ecclesia' sa faaaogaina i lona uiga faapolokiki, ma e lei faaaogaina muamua e faasino ai i se faapotopotoga o tagata o se tapuaiga. O le upu 'ecclesia' ua faaaogaina i le Feagaiga Fou e faailoa ai le Au Kerisiano mai le tapuaiga Iutaia lea e faaaogaina ai le upu 'sunako' (synagogue).

O le faavae o lenei ekklesia e faatemokarasi; o sitiseni uma e aia tutusa (equal rights) ma e iai lo latou saolotoga e faaalai ai manatu mo le faia o faaiuga e aafia ai i latou.

O lona uiga, o lenei upu o se upu faapolokiki, a ua faaaogaina e le au tusitala o le Feagaiga Fou e faasino i uluai faapotopotoga o le Au Kerisiano e tutusa uma ai tagata, e le gata ia latou aia, ae faapea foi i o latou tiute faale-tagata faatuatua.

E ui lava ina oloo ta'ua nisi o tulaga taua i totonu o uluai ekalesia e pei o toaina (elders or presbyters)(6), tiakono (deacons)(7) ma epikopo (bishops)(8), ae lei avea lea ma mea e vavae ese mai ai i latou mai isi tagata Kerisiano. E moni sa iai o latou tiute faapitoa, ma o i latou o taitai faaleagaga sa vaai le galuega, ae o le tele o tiute latou te faatinoina o tiute foi ia ua tuuina i soo se Kerisiano. Ma e lei avea o latou tulaga faataitai ma ala latou te pulea ai se ekalesia.(9).

(6) Galuega 20:17. 1 Timoteo 4:14, 5:17, Tito 1:5, Faaaliga 4:4, 19:4.

(7) Filipi 1:1, 1 Timoteo 3:8.

(8) 1 Timoteo 3:1, 1 Tito 1:7, Filipi 1:1.

(9) O toaina e faamalumalu, e lauga ma aoao tagata, o tiakono faaauau itulau e sosoo ai

# "O LE FAA-FAAPOTOPOTOGA (Congregationalism)"

e 'auauna' i soo se itu, e fesoasoani i le galuega (administration), e a'aa'o foi, asiiasi ma faia galuega alofa i tagata. O epikopo e tutusa ona tiute ma toeaina, o i latou o taitai e vaai le galuega.

E manino lea manatu, i nisi o mau mai le Feagaiga Fou e pei o le:

\* Galuega 1:24-26: Oloo taua ai le filifiliga o se aposetolo e sui ia Iuta, ma o se filifiliga sa faatinoina e tagata uma o le Ekalesia i Ierusalem.

\* Galuega 6:2-6: Oloo faamatala ai le filifiliga o tiakono e toafitu e tagaa uma o le Ekalesia, ae le na o aposetolo.

\* Mataio 18:15-20; 1 Korinito 6: Oloo faamanino ai o le galuega aoao ma le faatonutonu e faia e soo se Kerisiano ae le patino na o epikopo ma toeaina. O le galuega fai faatasi a le Ekalesia atoa, poo le au faatuatua.

O le faatemokarasi lea ua faatauaina i le Faa-faapotopotoga. Peitai, e oo mai i le seneturi e tolu ua manino mai lava le see ese o le Ekalesia mai ia faiga faa-temokarasi. Ua matauina ai le siitia o le malosi o tulaga tofi e pei ona taua i totonu o le Ekalesia, aemaise lava i le tulaga o le epikopo. Ua oo ai lava le epikopo i le tulaga na te pulea ai se Ekalesia i se vaega tele poo se itumalo o le Malo o Roma.

O le faatauaina tele o le epikopo lea na oo ai lava ina faapea Epikopo Cyril i le seneturi e 5: "O le epikopo e i totonu o

le Ekalesia, o le ekalesia e i totonu o le epikopo." O lona uiga, o le iai o le Ekalesia e faalagolago lea i le auai o le epikopo.

Ua le gatasi la lea manatu ma le talitonuga Faa-faapotopotoga; o le Ekalesia e le i totonu o se epikopo, a o le Ekalesia o le faapotopotoga lea ua iai totonu Iesu. O le auai o Iesu i se faapotopotoga o le avea ai lava lea o lea faapotopotoga ma Ekalesia. Aua o Iesu o le Ulu lea o le Ekalesia. A leai o Ia, ua leai foi se Ekalesia.

E pei ona muai taua, o le Ekalesia o le Malo o le Atua e le patino mo se vaega o tagata Kerisiano. O le Ekalesia o le aiga ua tuu faatasia i le alofa o Keriso, ma e tasi lava le ala i totonu o lea aiga, o le faatuatua; lea e tutusa uma ai tagata. O lona uiga e le sili atu le isi Kerisiano i lo le tasi Kerisiano, ae e i lalo uma tagata i le pule aoao a le Atua.

Peitai e iai foi vaivaiga o le faaaogaina o le upu ekklesia i lona uiga faa-temokarasi. Aua o le 'temokarasi' o se upu ua faaaogaina e faasino i se faiga faapolokiki. O lona uiga, o se pulega (poo se malo) e filifilia e tagata mo tagata. Peitai e le faapea le Ekalesia. E le o se temokarasi (democracy) e filifili ai tagata, a o le teokarasi (theocracy), e filifili ai le Atua. O lona uiga o le Ekalesia e pule aoao ai le Atua. O le feagaiga a le tagata ma le Atua, e le osia i le va o ni vaega poo ni pati tutusa. E leai, o le feagaiga e faia ai le

finagalo o le Atua, ae usitai ma faalogo ai le tagata. O le temokarasi i le Faa-faapotopotoga o le potopoto mai lea o tagata, e ui ina e aia tutusa ma saoloto, ae ua o mai faatasi e avea ma auuuna a Iesu e faia lona finagalo. O le uiga moni lea o le Ekalesia i le vaai Faa-faapotopotoga.

O le Faa-faapotopotoga, e faamamafa ai foi le tutoatasi o Ekalesia. O se tasi lea o foliga o Ekalesia o le Feagaiga Fou, e tutoatasi lava le Ekalesia mai se malosiaga poo se pulega i fafo atu o le li'o o le faapotopotoga. E pei o se faataitaiga, e leai se malosi e pulea ai e le Ekalesia i Efeso le Ekalesia i Korinito, pe aia ai foi le Ekalesia i Kalatia i le Ekalesia i Filipi. E tasi lava le malosiaga e faalagolago iai se Ekalesia, ua na o Iesu Keriso lea. Ua na o Ia e faalagolago iai le Ekalesia ia latou filifiliga ma faaiuga.

O se tasi o talitonuga tulimanu o le Faa-faapotopotoga e faapea, 'o le faapotopotoga o tagata faatuatua, o i na e iai le finagalo o le Atua.' Aua foi o lea na fetalai Iesu: O le mea e iai le toaluua poo le toatolu i lona igoa, o lea foi ua iai faatasi ma Ia. O lona uiga, o se filifiliga e faia e se Ekalesia, oloo faia faatasi ma Iesu.

O le faavae foi lea o le talitonuga Faa-faapotopotoga e ala i le valaauina o le tagata. O le valaauina o le tagata e valaau e le Atua, e pei ona valaau e le Atua le Au Perofeta, seia oo mai i le valaauina e Iesu o ona soo. I le talitonuga Faa-faapotopotoga, o le valaau a le Atua e ala mai le potopotoga o le au faatuatua. O le valaau e ala mai tagata, ae le o tofiga poo se Gafa Faa-Aposetolo. O le mafuaaga lava lea o le taua o le faapotopotoga

*faacauu itulau e sosoo ai*

# "O LE FAA-FAAPOTOPOTOGA (Congregationalism)"

o tagata faatuatua, aua o ina e ala mai ai le finagalo o le Atua.

O le taua foi lea o le faalagolago o tagata uma i le Agaga Paia o le Atua e ala i le tatalo, aemaise o le faalogo i le Upu a le Atua. Aua o le faalagolago lea e mauiina ai le auai pea o Iesu i se faapopotoga. Aua afai e le faalagolago i le Atua, e ono pau ai a latou filifiliga i aafiaga faaletagata e le atagia ai le finagalo o le Atua. O le faateetega tele lea i le Faa-faapopotoga, aua e tatau lava ona iloa e le faapopotoga o tagata lo latou faatauvaa ma le le atoatoa.

## O le Tapuaiga Faa-faapopotoga

O le Faa-faapopotoga e pei ona tau faaila mai, e faatauina tele le 'saolotoga' ma le 'tutoatasi' o le Ekalesia ae faapea foi le tagata faatuatua. Ma e faapea foi la i le faiga o tapuaiga O uluai Ekalesia Faapopotoga i totonu o Egelani i le faaiuga o le seneturi e 16, sa lei tamauina ni faiga o a latou tapuaiga e pei o le Ekalesia Agelekana. Aua foi o le tasi lea o mafuaaga o lo latou o ese mai le Ekalesia i Egelani. O a latou tapuaiga e le faapitoe se faasologa, ae faigofie lava lo latou faatinoga. E tele ina potopoto i fale o tagata, i totonu o fale tuufua, i luga o vaa, faapea i uta i le vao, e mafuta, e suesue ma fetufaa'i ai i le Tusi Paia ma fai a latou tatalo (10)

(10) E mafua ona potopoto i nofoaga tuufua, ona o le sosola

ese lea mai le sauaina o i latou. Ona o le vaitau lea sa faasaina ai i tulafono a le Malo Egelani ni potopotoga a ni Ekalesia laiti (Puritan Churches).

Latou te lei faatauina le nofoaga e tapuai ai, aua foi sa latou faamamafa le tapuai i le Agaga, ae le o le tapuai i le vaai o mata. Aua foi o le tasi lea o mafuaaga o lo latou tetee ma le o ese, ona o lo latou talitonuga oloo pisia lava tapuaiga faa-Agelekana i faiga faa-Katoliko Roma; e iai le faatauina o faatusa, o ofu talaloa iila, o pulou ma teuteu felanulanuai i totonu o a latou falesa. O faatusa ia faatasi ai ma faatagata, faamalama tioata felanulanuai ma ata, o nisi nei o mea sa manatu i latou e avefa ma ala e faalavelave ai le tapuai o le tagata i le Atua. Ma e ono oo ai foi ina tapuai le tagata i ia mea ae le tapuai i le Atua i le Agaga.

O le tasi lava lea o mafuaaga o le le faatauina e uluai tagata Faapopotoga o le fausiaina o ni falesa tetele, ae sa faaaogaina lava fale o aiga. Ina ua amata ona fausiaina o falesa i le seneturi e 19, sa fausiaina lava i ni ata ma foliga faigofie e pei o ni faletele sasao (halls), ua iai le pulelaa ma le laulau faamanatuga. Peitai ina ua oo mai le seneturi e 20, ua oo lava ina see ese le pulelaa i autafa ae ogatotonu i le atualuma le laulau faamanatuga. (11)

(11) O se faiga ua iloa ai le toe latalata atu i faiga Faa-Ekalesia

Katoliko Roma.

O le faiga foi o tapuaiga, na amata e saoloto lona faatinoina e pei ona taua, ae oo mai i le seneturi e 18, i le vai taimi o Isaac Watts, ua amata lava ona tino mai se faiga ua taliaina e tagata Faapopotoga. O foliga o tapuaiga e aofia ai le usuina o se salamo, tatalo amata, faitauina o le Tusi Paia, sosoo ai ma le isi salamo, laugaina o le Upu, ae mulimuli i le tatalo faafetai ma le tatalo faaiu. E oo mai le seneturi e 20, ua tele lava ina faatulagaina tapuaiga Faapopotoga i ni faiga e taga tasi ai. Ma o le vai taimi foi lea o le tele o tusi o faasologa o tapuaiga ua tusia.

O le usuina o pese i tapuaiga Faapopotoga, o se mea lea sa maua mai le Ekalesia Metotisi, aemaise lava le auuso o Charles ma John Wesley o e sa amataina le faatauina o le tusia, fatuina ma le usuina o pese lotu. Peitai e ui lava o Metotisi sa mua i malae i le faaaogaina o pese lotu, a o le Faa-faapopotoga lava e ala ia Isaac Watts na amataina le faiga lea ua iai le fatuina o pese lotu e oo mai i le taimi nei. E oo mai le seneturi e 19 ua matua lauiloa le usuina o pese e le gata i Ekalesia Faapopotoga ae faapea foi i isi ekalesia.

E pei ona foliga mai i le talafaasolopito o tapuaiga Faa-faapopotoga, na amata mai e le tamau sona faatinoga, aua e saoloto lava le ekalesia i ana faiga, ae mulimuli ane ua oo lava ina faatulaga ma taga tasi le faasologa o ana tapuaiga.

## O se Aotelega

E pei ona matau mai i le talafaasolopito o le Faa-faapopotoga, e tolu lava ni mea oloo faatauina, o le 'saolotoga', 'tutoatasi' ma le 'aia tutusa', e le

faacau itulau e sosoo ai

## ITULAU MO TUPULAGA TALAVOU

# A mafai ona ou faia - e te mafaia foi

Na amata mai lo'u olaga i le matua leai o se mea - matua leai lava. Na foa'i au e lo'u tina talavou e le'i faaipoipo i se tama'i nuu i Sasekauana i Kanata. Ona fai lea o a'u ma tama a se ulugalii ua matutua, e matitiva foi. O o la igoa o Ioane ma Mele Ligileta.

O lo'u tama fai, na ou ola a'e ma ou iloa, o se tagata matua alofa lava ia a'u. A o le faalavelave, e na te le 'ilafia lava se mea tau pisinisi.

O lo'u tama o se fai evagelia faavaitaimi, ae sa ia faatauina foi inisiua, ma fai lona tama'i faleoloa ma fai seevae, ae le'i manuia. Na oo ina matou see atu i se fale na faaavanoa mai i le agalelei o tagata o se aulotu i

Sanitiekona ona o lo matou matitiva.

Na oo ina lagona e lo'u tama lona valaauina mai e le Atua e galue faafaifeau, ma oo ai ina matua leai lava sa matou tupe. Afai lava e iai se tupe, poo se meaai foi, e uma ona faasoaina atu e lo'u tama i soo se isi a fia 'ai ona afe ane lea i lo matou fale ma 'ai ai, pe alu foi ma ave se tupe e tuuina atu iai e lo'u tama. E 16 ou tausaga ae ou pasi mai se aoga maualuga, ona ou tuua ai lea o lo'u aiga ae ou alu, ua ou alu e fai le mea ou te mana'o au iai.

O le mea muamua lava na oo iai la'u sailiga, o lo'u ala a'e lea ina ua fafagu a'u, ma ou tilotilo sa'o lava i le gutu o le fanagutuono. E to'alua tama ua la faamata'uina ma'ua ma sa'u uo a o ma momoe i se taavale i se paka.

"Sii i luga ou lima ma fao i luga o le nofoa. A uma ona mu le laau afitusi lenei ae ua gaoioi se isi o oulua, ona fana loa lea o oulua," o le faatonu lea a le isi o tama.

Na tasu'e o ma tino ma taga o ma 'ofu poo iai ni tupe. Na ou popole aua ua ou faalogo i tagata faapea latou te sauaina mataga ni tamaiti.

Ua pe nei le lauaafitusi, ae na vave ona toe tutu le isi laau. Na maua e le isi tama le \$1.50 i la'u taga, ma le \$2 i le taga a la'u uo. Na oo ina pe le laau afitusi lona lua, ae le'i faavavevave ona toe tutu se isi, ona ou manatu ai lea ua faaletonu tama pe o le a le mea o le a fai ia ma'ua. Na ou faalogo atu ua pa'o le amoti o le fana gutuono. Ua alu a'e le maluluina o lo'u tuasivi ma lo'u tuaua. Ua ou matua fefe, aua e mafai lava e tama ona tafana ma'ua ae le lagona mai e se isi aua o lea e mamafa le pa'u o timuga. Na ou manatua lo'u tama ma lana masani o le tatalo. A na ia iloa le mea o tupu, e le taumate e tatalo i le Alii mo ma'ua. A o le taimi foi lea na oo mai ai lo'u mafanafana, ina ua ou manatua le masani a lo'u tama o le tatalo mo ma'ua ma lo'u tina.

O le taimi lea na ou faalogo atu ai ua tagotago mai le isi tama i lo'u alofilima. "Lau 30 sene lea e faatau ai sau meaai."

*faacau itulau e sosoo ai*

## "O LE FAA-FAAPOTOPOTOGA (Congregationalism)"

gata o ekalesia taitasi poo aulotu, ae faapea foi ma tagata faatuatua uma. Ma atonu o nei mea o ni vaega lelei ia o le Faa-faapotopotoga. E pei ona fai mai se tasi o tama sa faatalatalanoaina, "O tatou o le Ekalesia sili, aua o le Ekalesia saoloto." Atonu e sa'o foi lenei manatu, ae peitai, e iai foi vaivaiga o faiga Faa-potopotoga e pei foi o isi faiga e pei o le Faa-epikopo, Faa-perepereane, Faa-Metotisi, Faa-Agelekana ma isi.

Aua foi e leai lava se faiga e atoatoa.

E iai se manatu faapea, o le Faa-faapotopotoga moni lava ia, o se mea e faigata tele ona ausia. E pei lava ona atagia i lona talafaasolopito, e amata o latalata i le Faa-faapotopotoga e pei ona iai i le Feagaiga Fou, ae alu alu ua tau mamao foi. E mafua aisea? E mafua ona e le mafai lava ona tutoatasi pe saoloto o se ekalesia, aua e manaomia le fesootai i lalo o se pulega. E le mafai foi ona ova saoloto tagata, aua o le a le maua ai se maopoopoga. E le mafai foi ona

aia tutusa tagata uma, aua e faigata ai ona maua se tasi.

Ioe, e faigata ona maua se Ekalesia atoatoa, aua foi o tatou o tagata le atoatoa, ma o le taua lea o lo tatou faalagolago i le Atua, aua o lona auai mai e faaatoatoaina ai tatou. O le Atua lava ia o le Atua fia auai mai i lana Ekalesia. Atonu o le uiga lea o poloaiga a lo tatou Alii.

"Aua o le mea ua potopoto ai se toalua, poo se toatolu i lo'u igoa, ou te iai faatasi ma i latou.....faauta foi, ou te ia te outou i aso uma lava, e oo i le gataaga o le lalolagi."

## ITULAU MO TUPULAGA TALAVOU

### O LE LAUGA MO LE ASD SA O TUPULAGA

uma mo le saogalemu, ae maise le faa'oloaina o le tagata, ua sulufa'i atu mo se faaolataga.

Na iloa mulimuli ane e Poasa, e lē toatasi ae toalua fafine ua oti a la'ua tane. E le'i liua ai pe faaitiitia lona agalelei, ae peisea'i ua saga faaopoopo, ma faaluaina le malosi o lona alofa.

O le alofa moni e lē tu'ufesili, e lē faamasino pe ua mativa iseā. E lē tau le pua, pe tusi le lima, poo fea e pogai ai le mativa. E lē faatuai, pe faatali, se'i lata i le isi sailiga tofi; ae faanatinati e saili vave le fofō. E le'i lualuagia foi le alofa o Poasa; e le'i faatitilo i se tau e faapaleni ai mea ua to'esca. Na fiafia o ia e ofo fua atu, auā ua ia talitonu, o le Atua na te faamanuia.

E fa'aaogā e le Atua tofiga ma tulaga, o le potu ma le a'oa'oina, ae maise le tamaoiga, e fai ma ana meafaigaluega, pe a fa'aaogā lelei mo le lavea'iina o le mativa ma le matelaina.

O tulafono a Isaraclu faataata i le

seleselega, e sa ona selesele tulimanu o le fanua – e fai lena mo e matitiva. E sa ona toe foi faalua le seleselega; e sa ona toe ao mai karite poo saito ua pa'u'ū, poo ua galo; e sa ona mata faasiasia le aufaigaluega i tagata matitiva. O aiaiga uma ina ia manuia le tagata mativa ua lē tagolima.

O tulafono ia na agavaa ai Ruta e saofagā atu i le fanua o Poasa, ma maua mai ai taumafa mo i la'ua ma Naomi. O tulafono na faaosofia e le Agaga o le Atua, e auala mai i le au fai tofa ma le au fai uta o Isaraclu, ina ia manuia ai le tagata vaivai ma le mativa, o le nuu o le Atua.

O tulafono o mea lelei, e faataunuu ai le finagalo o le Atua. Ua maitauina le tele o tulafono ma suiga i si o tatou foi malo, ona o le moe manatunatu o ta'ita'i mo le manuia o le atunuu.

O tulafono uma e faavae i le alofa i tagata aupito maulalo le soifuaga, o tulafono ia mai le Atua, na faaosofia ma faama'ite e le Agaga

toe ola i se olaga tafaovale ma le faasamasamanoa, ae o le a ou alu e matua saili sa'u galuega aua so'u manuia i le lumana'i.

Nei la ua ou toe tepa i tua, a ua atoa le 45 o tausaga o aveva a'u ma tagata 'autu i le talafaasolopito o faafiafiaga i leitio, ma ou mafaufau ai i manuia ua ou maua, ua tusia foi ni a'u tusi ua tele tupe ua ou maua ai, valaauina a'u ou te lauga i le tele o faatasiga ma fonotaga, ma ou faia'oga foi i le iunivesite, ua atoa foi le 58 tausaga o ma nonofo ma lo'u to'alua lava lea na ou ulua'i

o le Atua.

Pe afai o i ai ni tulafono e faatino atu, ua atili tamaoiga ai le fai'oa, ae saga mativa ai le lē tagolima; poo ni tulafono ua manuia faapito ai na o se ituaiga, ma se vaega toaititi; o lona uiga, o ni tulafono na fausia i le ma'ema'e o le silafia faaletagata, ae le'i amatamea ai le Agaga o le Atua. E ui ina pasia ona o le toatele, ae lē faamaonia, ma e lē sainia e le Atua.

E i ai le aganuu a Isaraclu, e faasino i le faatau mai ma faatau atu o se fanua, poo se tofi o lē ua maliu. O le aganuu e toe faafoi ai mea totino i le tagata e ana. E faapea foi le isi agaifanua, faasino i le aveva ma tausi tama, e fa'aaau ai le suafa ma le tofi o lē ua maliu.

O aganuu ia a Isaraclu, na mafai ai e Poasa ona faatau mea uma sa ia Elimeleka ma Maalona, nai le lima o Naomi; ua faatau faatasi ai ma Ruta, e fai mana avā, ma faataunuu ai lona tiute o le tausi tama.

E leai se tasi e lē faamemelo i la tatou tu ma le aganuu matagofie Samoa, o le meaalofa mai le Atua. Ae o le fesili, Se a ea le aogā o tu ma agaifanua, pe afai e lē tino mai ai le 'a'ao lavea'i o le Atua mo ona lava tagata? Se a le uiga o le mamalu

*faaauau itulau e 15*

## A mafai ona ou faia - e te mafaia foi

A ou toe mafaufau atu nei iai, o lo'u faaofia lena i le lalolagi o faafitauli ma lu'itau o le olaga. O le taimi na tuu mai ai le 30 sene e le tama ia a'u, o le taimi lena na ou faapea ifo ai, o le a ou le

faavalevlea iai i le amataga, to'afa ai la'u fanau, to'afitu fanau a la'u fanau, valu fanau a fanau a fanau.....ae na amata mai i la'u ta'utinoga na fai ina ua te'a le faalala mai o le gutu o le fanagutuono i lo'u muulu a o o'u taa faasamasamanoa, ona ou manatu ai lea, a na le suia lo'u alavaa i le taimi lea ina ua ou manatua talosaga fai soo a si ou tama, ou te le maua manuia ua ou maua nei.

tusia e Art Linkletter  
faamatalaina e Afemata T.  
Apelu Aiavao

## SAUNIGA LOTU FONO TELE 2012

<i>Lotu Falosaga Au Toeaina:</i>	<i>Tavita Taulealo FT</i>	<i>Manukau</i>
<i>Lotu Au Taumafai:</i>	<i>Timoteo Momoemausu FS</i>	<i>Lotofaga-Lepa-Aleipata</i>
<i>Lotu o Nuu Ese:</i>	<i>Kolia Fiu Kolia FS</i>	<i>Niusaelese</i>
<i>Lotu Au Leoleo:</i>	<i>Serulo Lago 'o FT</i>	<i>Amerika</i>
<b><u>Sauniga o le Faauga:</u></b>		
<i>Ta'ita'i:</i>	<i>Apelu Lelevaga FT</i>	<i>Malua</i>
<i>Faitau Tusi Paia:</i>	<i>Aliimau Manū FT</i>	<i>Faasaleleaga</i>
<i>Tatalo:</i>	<i>Kerita Reupena FT</i>	<i>Kuiniselani</i>
<i>Ofoina o A'oa'o:</i>	<i>Tautiaga Senara FT</i>	<i>Aana</i>
<i>Faa'e'elima:</i>	<i>Apelu Lelevaga FT</i>	<i>Malua</i>
	<i>Peleti Toailoa FT</i>	<i>Niusaelese</i>
	<i>Liki Tiatia FT</i>	<i>Amerika</i>
	<i>Iosia Evile FT</i>	<i>Hawaii</i>
	<i>Tavita Roma FT</i>	<i>Faasaleleaga</i>
	<i>Lauina Vui FT</i>	<i>Apia i Sasa'e</i>
<i>Lotu mo Tupulaga:</i>	<i>Auatama Esera FS</i>	<i>Faasaleleaga</i>
<b><u>Lotu o le Aso Sa:</u></b>		
<i>Iupeli (Taeao)</i>	<i>Peleti Toailoa FT</i>	<i>Niusaelese</i>
<i>Maota o Tinā (Taeao)</i>	<i>Tunumoso S. Iosia FT</i>	<i>Falealili i Sisifo</i>
<i>Iupeli (Afiafi)</i>	<i>Misikopa Loli FS</i>	<i>Aukilani</i>
<i>Maota o Tinā (Afiafi)</i>	<i>Mālō Tanielu FS</i>	<i>Ituotane</i>

## **O le Tulafono Auro:**

Na faasilasila e Iesu, e na o le lua lava mea e taua i le tapuaiga i le Atua: (i) o le alofa i le Atua ma lou loto atoa; (ii) alofa i le lua te tuaoi e pei o oe lava ia te oe. O le tagata na te faia le mea lea, pe na te faatinoina le Tulafono Auro lea i lona olaga, e onomea iai le ta'u, o le tagata lotu. O le toatele o tatou, poo tatou uma foi, e tatou te alolofā i le Atua. Tatou te ava ma faaaloalo i le Atua; tatou te matata'u i le Atua. Ae a oo mai loa i lona lua o vaega o le

Tulafono Auro lea e faapea mai ia e alofa atu i le lua te tuaoi ia pei o oe lava ia te oe, ona faaletonu loa lea o tatou. A tatou nonofo i lalo ma mafaufau i le vaega lea, ona tatou iloa ai lea, e tatou matua solitulafono ai lava. E le o faatinoina so tatou alofa i isi tagata. Tatou te faaleaga i isi tagata. Tatou te le fesoasoani i isi tagata. Tatou te manumanu ia tatou tupe ma mea'ai ae le se'i fai se alofa i isi tagata. A o le soifuaga atoa o Iesu,

na o mea e fesoasoani ai i isi tagata mea na ia faia. O le faaa'oa'o lava lea ua ia faia mo tatou. Ae le pupula ai lava o tatou mata. E moni oloo tatou alolofa i nisi tagata, a o le anoano o tagata tatou te le alolofa iai, e mata'utia! Tafefe i se lelei o lo tatou aiga, lo tatou nuu, lo tatou atunuu, a o le lalolagi, pe a na faapea e tatou te alolofa moni i e tatou te tuaoi, e pei o tatou lava ia tatou.

O le Tulafono Auro e magalua: alofa i le Atua ma lou loto atoa; alofa i le lua te tuaoi e pei o oe lava ia te oe.

---

# **FAASOLOGA FONO TELE 2012**

## **MALUA, ASO 14 - 25 ME**

**“Fetalai mai ia, le Alii, aua o lo’o faalogologo atu lau auauna”  
 (“Speak Lord, for your servant is listening.” I Samuelu 3:9)**

<b><u>ASO</u></b>	<b><u>TAIMI</u></b>	<b><u>KOMITI &amp; SAUNIGANOFOAGA</u></b>	
<b>ASO GAFUA</b> 14/05/12	10.00am 1.00pm 7.00pm	<b>Komiti Faatonu</b> <b>Komiti o Atiina’e</b> <b>Lotu Talosaga Au Toeaina</b> <b>Ta’ita’i: Tavita Taulealo FT</b>	<b>Fale Iupeli</b> <b>Fale Senetenari</b> <b>Fale Iupeli</b> <b>Manukau</b>
<b>ASO LUA</b> 14/05/12	8.00am 9.00am 7.00pm	<b>Komiti Au Toeaina</b> <b>Komiti o Aoga</b> <b>Faletua Au Toeaina</b> <b>Komiti Faamisionare</b>	<b>Fale Iupeli</b> <b>Fale Senetenari</b> <b>Fale o Tina</b> <b>Fale Mafutaga</b>
<b>ASO LULU</b> 16/05/12	8.00am 9.00am 2.00pm 7.00pm	<b>Komiti o Feau Eseese</b> <b>Komiti Au Taumafai</b> <b>TPT: Tautua Puapuaga o Tagata</b> <b>Komiti o Feau Eseese</b> <b>Lotu Au Taumafai</b> <b>Ta’ita’i: Timoteo Momoemausu FS</b>	<b>Fale Senetenari</b> <b>Fale Mafutaga</b> <b>Fale o Tina</b> <b>Fale Mafutaga</b> <b>Fale Iupeli</b> <b>Lotofaga-Lepa-Alcipata</b>
<b>ASO TOFI</b> 17/05/12	8.00am 9.00am 1.30pm 3.00pm 7.00pm	<b>Komiti o Tupe</b> <b>Komiti Au Leoleo</b> <b>Lotu Mafutaga Tina</b> <b>TPT: Teine Papauta Tuai</b> <b>Fono Mafutaga Tina</b> <b>Lotu o Nuu Ese</b> <b>Ta’ita’i: Kolia Fiu Kolia FS</b>	<b>Fale Senetenari</b> <b>Fale Mafutaga</b> <b>Fale o Tina</b> <b>Fale o Tina</b> <b>Fale o Tina</b> <b>Fale Iupeli</b> <b>Niusaelese</b>
<b>ASO FARAILE</b> 18/05/12	5.00am 9.00am 2.00pm 7.00pm	<b>Lotu Au Leoleo</b> <b>Taitai: Serulo Lago’o FT</b> <b>Fono Mafutaga Tina</b> <b>Komiti o Tupe</b> <b>Komiti o Tupe</b> <b>Fono Malua Tuai</b>	<b>Fale Iupeli</b> <b>Amerika</b> <b>Fale o Tina</b> <b>Fale Mafutaga</b> <b>Fale Senetenari</b> <b>Fale Senetenari</b>
<b>ASO TOONAI</b> 19/05/12	9.00am 2.00pm	<b>SAUNIGA O LE FAAUUGA</b> <b>Taitai: Apelu Lelevaga FT</b> <b>Faitau Tusi Paia: Aliimau Manu FT</b> <b>Tatalo: Kerita Reupena FT</b> <b>Tu’uina o A’oa’o mo le Faauga:</b> <b>Tautiaga Senara FT -</b> <b>Faaelima: Apelu Lelevaga FT</b> <b>Peleti Toailoa FT</b> <b>Liki Tiatia FT</b> <b>Iosia Evile FT</b> <b>Tavita Roma FT</b> <b>Lauina Vui FT</b>	<b>Fale Iupeli</b> <b>Malua</b> <b>Faasaleleaga</b> <b>Kuiniselani</b> <b>Aana</b> <b>Malua</b> <b>Niusaelese</b> <b>Amerika</b> <b>Hawaii</b> <b>Faasaleleaga</b> <b>Apia i Sasa’e</b>
	2.00pm	<b>Lotu Tupulaga</b> <b>(Taitai: Auatama Esera FS)</b>	<b>Fale Iupeli</b> <b>(Faasaleleaga)</b>

*facaucui itulau e sosoo ai*

	7.00pm	TURA FAILA A USUFONO	Fale Fono
<b>ASO SA</b>	9.00am	LOTU TAEAO/FAAMANATUGA	Fale Iupeli
<b>20/05/12</b>		<b>(Taitai: Peleti Toailoa FT</b>	<b>(Niusauelese)</b>
		LOTU TAEAO/FAAMANATUGA	Fale o Tina
		<b>(Taitai: Tunumoso S. Iosia FT</b>	<b>(Falealilii i Sisifo)</b>
	6.00pm	LOTU AFIAFI	Fale Iupeli
		<b>(Taitai: Misikopa Loli FS</b>	<b>(Aukilani)</b>
		LOTU AFIAFI	Fale o Tina
		<b>(Taitai: Malo Tanielu FS</b>	<b>(Ituotane)</b>

**21 - 25, USUIA LE FONO TELE**

<b>ASO GAFUA</b>	7.45am	Tapuaiga Amata	
<b>21/05/12</b>		<b>Taitai: Lale Ieremia FT –</b>	<b>Taitaifono</b>
	10.00am	Pepa: Kolisi Faafai'feau i Malua	
	11.00am	Taualumaga o le Fono Tele.	
	12.00pm	Malologa mo Taumafataga o le Aoauli.	
	2.30pm	Fa'acua Taualumaga o le Fono.	
	5.30pm	Malolo le Fono	
	7.00pm	Faalauloa - Ofisa o Femalagaiga (Immigration).	
<b>ASO LUA</b>	7.45am	Tapuaiga Amata	
<b>22/05/12</b>		<b>Taitai: Esekielu S. Tanielu FT</b>	<b>(Penisione)</b>
	8.00am	<b>Pepa: Peleti Toailoa FT</b>	<b>(Au Toeaina)</b>
	9.00am	Taualumaga o le Fono Tele.	
	12.00pm	Malologa mo Taumafataga o le aoauli.	
	2.30pm	Fa'acua Taualumaga o le Fono	
	5.00pm	Malolo le Fono	
	7.00pm	Pepa –	
<b>ASO LULU</b>	7.45am	Tapuaiga Amata	
<b>23/05/12</b>		<b>Taitai: Mose Mauinatu FT</b>	<b>(Penisione)</b>
	8.00am	<b>Pepa: Mafutaga a Tinā.</b>	
	9.00am	Taualumaga o le Fono Tele	
	10.00am	SAUNIGA ALOAIA MO FAIFEAU PENISIONE	
		<b>Taitai: Tautiaga Senara FT</b>	
	12.00pm	Malologa mo Taumafataga o le aoauli	
	2.30pm	Fa'acua taualumaga o le Fono	
	5.00pm	Malolo le Fono	
	7.00pm	Pepa: Fale Andrew Lesa (Youth Leader)	
<b>ASO TOFI</b>	7.45am	Tapuaiga Amata	
<b>24/05/12</b>		<b>Taitai: Alaovae Alaovae FT</b>	<b>(Penisione)</b>
	8.00am	<b>Pepa: Muliaumasealii Metusela Tesimale TK</b>	<b>(Vitoria)</b>
	9.00am	Amata Taualumaga o le Fono Tele	
	12.00pm	Malolo mo Taumafataga o le aoauli	
	2.30pm	Fa'acua taualumaga o le Fono	
	5.00pm	Malolo le Fono	
	7.00pm	Feiloaiga Au Toeaina & Aufaigaluega Faifeau.	
<b>ASO FARAILE</b>	7.45am	Tapuaiga Amata	
<b>25/05/12</b>		<b>Taitai: Lale Ieremia FT</b>	<b>(Ta'ita'ifono)</b>
	8.00am	<b>Pepa: Matagaluega Apia.</b>	<b>Au Talavou</b>
	9.00am	Amata Taualumaga o le Fono Tele.	

## TAUALUMAGA O LE FAASOLOGA O LE FONO TELE:

- 1 *Faamaonia Iugafono Fono Tele 2011.*
- 2 *Mau Tu'u Sa'o mai Matagaluega.*
- 3 *Mau Tu'u Sa'o mai Komiti Tetele e Ono a le Ekalesia:*
- 5 *Faamaonia Galuega a Komiti.*
  - i. *Komiti o Tupe*
  - ii. *Komiti o FEAU ESEESE*
  - iii. *Komiti o A'oga*
  - iv. *Komiti o Atiinae*
  - v. *Komiti Faamisionare*
  - vi. *Komiti Au Toeaina.*
- 6 *Palota Sui Taitaifono.*

## FAILAUTUSIAOAO

# O LE LAUGA MO LE ASO SA O TUPULAGA

ma le tulaga ese, i le vaai mai fafo, a o lou lava lotoifale, o oi ma tigaina ou tagata i lona faatinoga?

O faanaunauga lava o le loto, ia pa'i atu le Tala Lelei e faa-Tala Lelei la tatou aganuu, ina ia 'ave'ese le matape'ape'a, taofi le tu'imanau, le mana'o fua ma le faaloloto. Ua fa'aaogā le aganuu e saili ai oloa ma mamalu a nisi, ae matitiva ai aiga ma le toatele o tatou tagata.

E le'i fa'aaogā sesē e Poasa le āva fatafata, ma le fa'aaloalo o tagata ia te ia, e sopoloa ai lana vaai i le mea e ao ona ia fai. Na te le'i faasili o ia, nai lo le isi uso mativa o lona aiga, e muamua atu ia te ia.

O le i'uga o leni tala, ua faamafanafanaina le tagata sa tiga; ua malosi lē sa vaivai. Ua sapaia e Naomi le tama ulumatua a Ruta ma Poasa, o le tama e 'auga i ai lona aiga.

O suiga tetele e faia e le Atua, i lona silasila alofa i le puapuaga tele. E le na o le puapuaga o Naomi ma le aiga mai Peteleema, ae o ana fuafuaga tuutuu mamao, mo le lavea'iina o le puapuaga faitele, ua oo i ai le fanau a tagata ona o le agasala.

E masaga lelei tiga na oo ia Naomi,

ma puapuaga na oo i ai le lepela Kalilaia, a o amata le galuega a Iesu. Auā e lē gata i tiga na lagona i le tino, e 'a'ati i ivi ma aano, ae sili atu foi tiga o le masiasi ma le faanoanoa, ina ua lē toe taliaina i totonu o faalapotopotoga o aiga, o nuu ma tapuaiga. Ua tapu i tulafono lona toe mafuta ane i tagata. Ua lē ma tāgofia; ua lē mafai ona toe pa'i atu i ai se tagata, ua inosia ma tuulafoaiina.

Ua faalogo le ma'i lepela, i le aave mai o tala ia Iesu, ma lona mana ua faamaloloina ai isi gasegase eseese. Na te le'i toe faatali, e le'i tuua le avanoa e alu loa. Ma na faia ai le mea mata'utia, ua alu ane i le mea o i ai tagata. Ua na tootuli ma aioi, e faaoololoma'au ma faatoga mamate, 'a 'e finagalo ai, alofa mai, faola mai.

O tatou uma o lepela, o tagata agasala. Ae eseese lava lepela. O isi lepela ua fiafia e lepelapela ai pea, ua lē iloa le eseese o le ma'i ma le maloloina. O isi lepela e faamoemoe e saili atu e isi lona togafitiga. O nisi foi lepela, ua faalogo e i ai le Foma'i, ae lē talitonu, e masalosalo. O nisi ua iloa le Foma'i, ae saili i taulasea fai mai o le ma'i aitu. A o le lepela leni, na faalogo ia Iesu, na talitonu ma faatuatua loa. Ua na

mautinoa, o le Foma'i lea, le tali i lona puapuagā.

E lē fo'i fua le tagata e alu ma le talitonu ia Iesu. Na te lē talituaalimaina. Ua silasila atu Iesu, ua faafofoga atu i lana aioi, ona mutimutivale lea o lona alofa ia te ia. Ua na faia le mea e lē talitonuina, e lē faatagaina, ua aapa atu lona aao, ua pa'i atu ia te ia. "Ou te loto i ai, ina mamā ia oe."

E lava ma toote le fetalaiga a Iesu, e faamalolo ai le lepela, aunoa ma lona tau pa'i atu. E malamalama foi le lepela, pe afai e lē pa'i atu le Alii, ne'i pisia ai o Ia. Peita'i, ona o le alofa o Iesu e moni, o le alofa ua tele, ua malosi, ua mutimutivale, na lē mafai ai ona taofi lona aao i le fia pa'i atu, e fesoota'i atu, ma avatu le tali, i lē ua lailoa i le fia mapu.

O le upu Eleni o loo faaliliu mai ai le veape o le pa'i, a oo ina faalautele, o lona uiga, e faatino i le matuā tago atu i ai; e aofia ai ma le fusi poo le opoopo mai. E pei o le tago atu a le tamā i le faata'oto, e opoopo mai lona atalii faamaumau'oa na leiloa, tainane ina pispisia ai, i le eleclea o leni tama.

O nisi foi taimi e oo lava ina tutulu ma sogi atu, auā o tāga uma ia a le alofa moni pe a pa'i. O a foi ni mea o i le lima, e tuu atu faatasi i le taimi e aapa atu ai. E pei o le pa'i atu a le Samaria agalelei, i le tagata na fasia; na liligi atu lana suau'u ma le uaina, na avatu lana manu, ma ana tenari e lua. E faapena le pa'i mai o Iesu. E sasa'a ato mai lona soifua, ia ola le tagata puapuagatia.

E lē o se faatauagavale o Iesu i tulafono, poo lona tete'e i tu faale tapuaiga, na la soli ai le tulafono e sa ona pa'i se tasi i se lepela. Ae o lana mau, "o le mea lea na ou sau ai", ia faatino le alofa, ia faola le tagata o tigaina ma mafatia i avega. Auā e taga i le alofa ona sosofa soo

*faacacau itulau e 16*

# O le mafutaga mafana a uso ia Keriso

O le pese: 'Blest be the tie that binds' - na tusia e Dr John Fawcett, o le faifeau o se aulotu Papatiso toaitiiti lava ma le matitiva i Uenisiketi i Iokisia, (Wainsgate, Yorkshire)

O le totogi o le faifeau i le tausaga e 25 pauni, pe o le tusa lea o le \$60, e matua le lava lava lea e tausi ai lona aiga. Ona talia ai lea e ia ma lona faletua se

valaau mai se isi aulotu Papatiso toatele ma le tamaoiga i le aai tele o Lonetona le laumua o Peretania.

Ua oo i lona Aso Sa mulimuli i Uenisiketi, ona fai ai lea o lana lauga faamavae. O le aso na sosoo ai, na la'u ai a la mea totino i taavale mo le sii atu i Lonetona. Ae ua lolofi atu le la aulotu toaitiiti, ma fetagisi ma aioi ia Dr John Fawcett ma lona faletua, e aua le o ae nonofo ma galulue mo latou. Na matua lagona e le alii faifeau ma lona faletua le faanoanoa o le aulotu, ma ua tuia ai foi o la loto i le fetagisi ane. Ua nonofo nei i lalo i talaane o taavale ua tumu ia la mea totino, ma fetagisi foi la'ua.

"Toane, e le mafai ona ou alu a o fetagisi faapenei si a ta aulotu. 'Aua ia ta te o. Ta nonofo pea iinei.'" O le tagi lea a le faletua ma fai atu i lona toalua faifeau.

Na matua alalaga fiafia le aulotu ina ua toe la'u i lalo mea totino a le faifeau ma lona toalua ina ua la talia le fetagisi mai o le la aulotu toaitiiti ma le matitiva.

Ona tusia ai lea e Dr. John Fawcett le pese, 'Blest be the tie that binds', e faamanatu ai le mea lenei na tupu. E a'oa'o mai ai, e sili le mafutaga fiafia ma le fealofani a le au pa'ia, i lo ni tupe e tele e maua mai se aulotu tele ma le tamaoiga.

## O LE LAUGA MO LE ASO SA O TUPULAGA

se pa puipui, e tula'i mai i le ala o le faaolataga.

O le upu **mutimutivale** o faamatala ai le alofa o Iesu, e tupuga mai le upu Eleni, e mafai ona faaliliu i le **tiga**. *Ona tiga lea o le alofa o Iesu.*

O lona uiga, a o mutimutivale lona alofa i le tagata, a o le taimi foi lea, o tiga lona finagalo i le ma'i lelela o loo faataotolia ai. O lona tiga lava lea i le tiapolo, auā o ia lea o loo i tua o puapuagā ma mafatiaga uma o le fanau a tagata. O le tetee o le tiapolo faasaga i le Atua, ua na tago ane ai e faatigā le tagata, na faia i le faatusa o le Atua. O le tago atu la o Iesu i le lelela, o lona tago atu lava lea, e faatoilalo le tiapolo, ma tuli ese mai lona uso a tagata.

E faapea ane le tiapolo, e te fiu lava e faamalolo lona tino, ae lē tumau ai lona lelei; e i'u lava ina oti ma pala ai. O le lesona lea a le Faia'oga o Iesu, na ta'u atu i le tiapolo i lea aso. Ia iloa e le tiapolo, o lona oo mai, o le oo mai lea o le malo ma le pule aoa o le Atua. O le mea ua ia

vaai i ai i le asō, ua o se fa'ataata ma se faatomua, i le aso tele e taualuga ai lana galuega faa Foma'i. I lona maliu ma lona toe tu manumalo, na te toe faatutū ai tagata faatuatua uma, na te liua lenei tino ua leaga, i le tino matagofie, e lē toe pala e faavavau.

O le tala fiafia lea mo le lelela, a o le Tala Lelei foi lea mo i tatou uma, tagata agasala. Pe afai tatou te o atu i ona luma ma le loto nutimomoia, e ta'utino lo tatou leaga, ma faatuatua na te mafai ona lavea'i i tatou.

O outou tupulaga, ia outou mataala i auala eseese a le tiapolo i nei aso, e faaleaga ai lo outou lumanai manuia. O le tekonoosi, a sa'o ma lelei lona fa'aaogaina, e ave ma auala e pa'i atu ai faamanuiaga, i lau a'oga ma lau galuega. Ae afai e fa'aaoga sesē, e ave ma lelela na te tuu oe i se tulaga, e lē toe fia pa'i atu ai se tagata ia te oe.

O outou o le lumana'i o mea uma. Afai e to'atele ni teine alolofa pei o

Ruta, ma ni tama e alolofa pei o Poasa, e lē taumate le lavea'iina o le tele o puapuaga o le taimi nei, ma a taeao.

O le tatalo foi lea i matua ma ta'ita'i, o le Ekalesia ma le malo, ina ia tuu ane Tupulaga, o alo ma fanau a le atunuu, e faamuamua i au anavatau, o au polokalame ma fuafuaga faataatitia.

E mālie le lelela, e faatonu atu e Iesu e 'aua le tala'ia, ae atili ai lona alu ma faasalalau. O le vaai a nisi, ua lē usita'i le lelela, ua maumau le taimi na faoia ai. A o a'u lava ia, O ai a lē fia molimau i lenei alofa silisili ese? A o le ā le aogā o lenei tino fou ua toe maua mai? E lē mana'o le Foma'i i se totogi. Ua tuumuli o Ia i le mea tuufua, ua afio i lona nofoalii i le Lagi, ae ua tuu mai ia i tatou e fa'aauau lana galuega. Tau ina ia 'ave lou ola ia aogā, e fai ma sulu e mumū, e fai ma pese malie, e fia faalogo ai e ua mapuaitigā, ae viia ai lona suafa e faavavau, faavavau lava. Amene.

Faito'aga Tolua F.S.

Ofisa o Aoaoga Kerisiano